

請

纓

日

記

請纓日記卷七

灌陽 唐景崧 維卿

光緒十一年乙酉正月初一日丁統領短衣泥履來營  
賀年景軍將弁俱來賀枯槁無人色槍礮之聲猶不絕  
於耳市商漸集而價極翔貴銀二十兩買米百觔銀七  
錢換豚肉一觔鮮蔬絕少日食鹽菜而已骨痛喉腫勉  
起巡營

正月初二初三日我軍滾草攻城不克

正月初四日文童菊蘭譽扶談克昌柩啓行帶隊哭送  
之至右營所禁寺中窺城內甚悉土山對峙殺氣雲騰

槍彈拂拂左右

正月初七日接芷菴信報諒山於十二月二十九日爲法所據琴帥先於二十八日退駐南關各軍但調入關法兵至文淵州築礮臺文淵距南關八里琴帥繼退幕府龍州大震我軍餉械交琴石走南甯運往百色恭錄  
正月初三日電

旨李鴻章轉電潘鼎新電稱法眾上犯日夜鏖戰等語諒山軍情緊要潘鼎新身臨前敵王德榜王孝祺等軍均聽候調遣以一事權馮子材著幫辦廣西關外軍務所統各營亦歸潘鼎新調派該撫暨該幫辦等務當和

衷切切力辦迅速圖功儻各軍不遵調度卽嚴參治罪  
陳嘉受傷曾否平復殊深厼系宣光業已得手著岑毓  
英嚴飭丁槐唐景崧劉永福等軍指日攻克毋稍鬆勁  
欽此又初五日電

旨聞諒山失事曷勝憤懣著潘鼎新將情形迅卽電奏  
該撫與蘇元春馮子材當督軍擇要穩紮激勵將士迅  
速進取儻不能振奮圖功貽誤大局自問當得何罪王  
德榜軍曾否接仗嚴飭實力會勦王孝祺率隊赴諒現  
抵何處著催令進兵前據岑毓英電稱宣光旦夕可拔  
近日戰事若何未見電奏法逆如盤踞諒山計必分兵

卷之二  
救宣雲軍垂成之功恐將掣動著飭各軍急將該城攻克掃蕩而前以分敵勢一面即行電聞雲粵各軍餉械張之洞力籌接濟毋任缺乏欽此

正月初八日辰刻丁軍又轟地雷城崩丈許法兵奔救景軍據嶺上然槍截擊倒斃無數丁軍再發一雷去初轟之地不遠城再崩甞石亂飛壓斃法虜十餘人景軍先於五鼓積草北城下至是眾軍踐草而上法兵拚死力拒槍礮齊發殺聲震山余與丁統領押隊督攻誓不准退而傷卒紛紛曳下慘不可言不得已撤兵此次係右營哨官賴朝榮鄒全鴻自請奮攻不克摘去頂戴諒

山既失又聞敵援將至急欲攻拔以致損我多士歸坐帳中歎息不已本日令賴朝榮鄒全鴻在城之西北角土阜繁一小壘距城二丈賞銀四百兩壘在阜背掘塹伏兵以避敵槍準備我軍進攻缺口即據阜嶺用槍截擊奔救之敵兵蓋此時與敵雖隔一城竟可交槍而戰彥帥派弁運到大開花礮二尊轟毀洋樓數座賞雲軍四千兩景軍二千兩犒師

正月初九日賴朝榮鄒全鴻被譴愧奮相約往觀雷轟之缺口請挑隊奮攻余乃約丁統領行地道中往窺缺口商進兵之路每於濠淺處必鞠躬以行昂首即受槍

然地道中亦有中彈者聽命而已賴鄒就本哨揀得頭等先鋒三十八人二等先鋒五十人署狀首奪缺口得城頭等一人賞三百兩二等一人賞二百兩豫給印票各先賞番銀一元刑牲煮酒然礮祭旗又派右營管帶劉九如前營幫帶劉仁栢帶隊接應左後營攻北城以掣敵勢景軍爲一路攻一缺口丁軍爲一路攻一缺口三鼓余與丁統領坐所奪南門礮臺下四鼓齊隊傳令五鼓乘暗進攻而頭等勇丁請於賴鄒曰我等死勇願一見統領且各乞十金余笑問打仗攜銀何爲眾叩首曰先登必凶願一見白鑑而死獎慰再四立遺差官回坐

營飛取三百金往旋十里適遇野獸繞道行銀至而東方漸白三十人裹銀負槍驟馳去奔缺口大呼躍登城賴朝榮鄒全鴻督二隊五十人繼上敵槍已密不能衝進大隊更不能前先是丁軍約我軍齊伏城下發號一鼓併進而我頭隊不及待發號猛搶登城死二十四人生還六人鄒全鴻兩傷余聞信神魂沮喪問尸何在眾曰不見尸當死城中矣初十日辰刻徒步走五里回營竟夕未卧憊甚而龍州飛報法兵已及瓦封窺牧馬我軍後路將斷彥帥函令相機撤師勿拚孤注適奉廷旨嚴飭攻拔且不肯功棄垂成於是函約丁何本夕

再攻傳令奮勇者報名勇士敢帶隊押隊者給軍功牌  
差官伍義廷願帶隊親兵什長姚紀昌覃啓發願押隊  
尙少一人帶隊乃再派賴朝榮選得頭隊先鋒五十人  
二隊先鋒一百五十人大隊五百人在後接應賞格如  
前仍各先賞酒內銀一元帶隊押隊官八元列隊營門  
面加獎勵語隊長曰不得城毋見我約定我軍攻一缺口  
何軍發地雷亦任攻一缺口俟雷發三路齊進我軍  
分攻西北門部署畢而營哨官密稟本日無糧亟搜厨  
下得米二百觔益以淵亭所饋糯米百觔給戰士晚餐  
大隊令自覓糧三鼓余至丁統領營仍與坐礮臺下雲

樓四鼓至各軍齊隊五鼓地雷發聲殷殷而城未動三路兵奔缺口城中槍礮齊鳴余與衡三雲樓督隊於礮臺下法虜死拒缺口我軍再進再卻有已登城而墜隙者有喋血於城下者後隊人密城槍亂下被傷尤眾賴朝榮伍義廷姚紀昌俱陣亡覃啓發受傷丁何兩軍亦多傷亡此十一日卯刻攻缺口之情形也隊長四人亡三傷一勇士更不計數頓足痛憾灑淚歸營賴朝榮尸奪回伍義廷姚紀昌不得尸夜遣人覓骸城下獲十二具終不見二人尸

請纓客曰明知攻堅兵家下策也而事急不得不攻且

城垂拔亦不肯鬆勁賴朝榮福建人與鄒全鴻同籍二人皆好大言又性暴故不肯委爲營官而是時軍中猛銳無逾二將者賴朝榮初十日戰歸十一日不欲往眾激之行知必死託子於我差官賴姓亦名朝榮者從容慷慨與談克昌皆有烈士風焉奏入蒙

敕部優卹家桂林其族弟某來見贈金養其家香瀟尚書亦捐廉卹賞歿後無棺殮以橋板縫不掩骸竟莫能運兼以倉卒拔歸夫難道險遂與龐宜甫柩並厝於霑化州城擬事稍定移歸不料此地轉眼爲狐兔場矣疚心至今負我友將伍義廷雲南人本右營勇丁十二月

十一日之戰賞其勇拔爲差官即夕命帶隊赴東城下尋死士骸獲一具賞二十金伍義廷冒險獲五具後屢傍城下探事是日慷慨請行竟死其家不知有何人也姚紀昌廣西人充親兵最久行必扶輿是日事不濟同黨勸其退紀昌曰統領有言城不克毋來見何敢歸營中槍墮濠死

正月十二日挑隊再攻參將鄧有忠什長汪鼎臣帶隊什長覃啓發趙全紅押隊置酒營門延之上坐勉以此次志在必克以李文忠劉仁柏劉玉貴帶領大隊在後接應丁何新得賞項所挑奮勇俱畀現銀朱額爲誌退

後者斬余三鼓至丁營何軍再發地雷四鼓齊隊地雷  
發城微崩飛石斃我軍數人趙全紅腰傷仍分三路撲  
攻缺口城槍絡繹忽遠忽近我軍兼攻北門呼聲震天  
丁軍後隊以爲得手亟呼守營軍齊進而頭隊在前力  
攻不入戰至十三日卯刻不得不退大隊擁擠地道中  
余令箭不得前鄧有忠劉玉貴汪鼎臣覃啓發均己傷  
不敢退立久傷人愈多鄧覃傷尤重辰刻始撤下至是  
連攻三日矣折將損兵計已不少三人議曰敵援且至  
宜少休息以防敵人生力軍雲樓乃命參將馬維騏帶  
三營助劉軍截河維時城中糧彈將盡日夕可拔每聞

哭聲而城虜終不張皇更柝寂然夜以電氣燈巡堞數周而已洶勁敵哉正月十三日電

旨岑毓英張之洞電稱雲粵各軍力攻宣光苦戰不退等語官軍奮勇進攻深堪嘉尚著岑毓英激勵各將領將宣光剋日攻拔迅奏膚功據探援敵將到並聞有太原法兵圖犯宣光後路之說著督軍扼紮嚴密防範毋爲所乘前據鮑超奏報於十二月初二日自川啓行刻下行抵何處著迅速電聞欽此又

旨李鴻章轉電岑毓英電奏宣光軍情已悉丁槐唐景崧等督隊猛攻均屬奮勇仍須穩慎進攻相機克復庶

不至多傷精銳至力扼寇援尤關緊要著今毓英督飭  
劉永福嚴扼端雄鉅嶺一帶要路認真截擊使彼族不  
能聯爲一氣攻剿自易得手欽此此正月二十一日電  
旨也

正月十四日接芷菴報本月初五初六等日萃軍戰法  
於文淵蘇軍勤軍繼至無勝負又報初九日楊雲陪軍  
門陣亡於文淵蘇軍退守關前隘法兵入鎮南關轟毀  
關門旋去琴帥退駐海村扒船中蘇軍退紮幕府湖北  
新到六營道員魏綱統之名衡勝軍

請纓客曰楊雲陪蜀軍門在漁平回匪起家決盪縱橫

獨當一面潘中丞視若裨將僅畀以廣武軍數千南皮謂其憤鬱以死有以夫雖然雲階死天下遂無訾雲階短者竟以一死成勳業完人豈非奇幸哉其少妾牛氏亦殉節死雲階草菅粉黛乃獲此烈女報更奇

正月十五日聞法援兵至端雄端雄距左育約百里水路入宣光必由之道駐有法營余屢請雲軍擊端雄則敵援可截彥帥云檄總兵覃修綱兵進端雄尙未拔隊恭錄正月十三日電

旨潘鼎新迭次電奏諒山失守並法眾犯鎮南關等語所請治罪之處著潘鼎新將詳細情形具摺馳奏再降

諭旨並著該撫戴罪圖功督飭各軍擇要扼紮實力守  
禦倘該撫及各統將不能妥籌防勦再有退挫致敵蹤  
關入邊境定即從重法治罪蘇元春連日鏖戰獲勝現  
雖退紮幕府軍勢尙可復振當與潘鼎新扼險駐軍力  
圖堵勦李秉衡近在龍州著隨同該撫籌辦軍事馮子  
材王德榜經潘鼎新飛催不至可憾已極著張之洞潘  
鼎新傳旨嚴飭援勦儻再玩延卽照軍法從事潘鼎新  
前電稱馬盛治克多福府續電又稱馬盛治未克多福  
府兩歧著查明電奏欽此

請纓客曰諒山失後蘇軍潰卒未集潘督師乃無故奏

有巴平之捷

旨稱蘇元春連日戰勝當據所奏而云然也諒山喫緊  
萃軍甫到十營軍裝未備繼募八營未齊勢難驅進勤  
軍入營東來途次斬一索饑勇丁眾乃譁潰抵龍州不  
及二千人趕募亦不能赴援王朗青治軍嚴整而性情  
驕慢自負湘中老將每與督師鬭齷據云事急時督師  
一日間檄五六下調其所部倏東倏西無所適從並非  
抗調朗青初不遵署廣西提督之

旨繼又敗於豐谷至是被催援不至之劾遂褫職候察  
辦所部歸蘇接統正在諒山大捷報未入都之際當是

時主客各軍不能共緩急圖奮取督師又意氣自用且  
跡近偏袒蘇軍故谷松一敗眾軍袖手坐視顛覆而不  
救豈眞法人之猛悍不可制哉蓋亦我將帥不和之所  
致也滇軍雖恢復無聞而將領皆西林舊部號令專嚴  
穩繁未曾一挫其攻宣光也如我景營無不讓丁鎮護  
劉提故有七十餘日合力同心之苦戰城雖未克虜受  
奇窘傳曰師克在和非千古兵法之要義歟

正月十六日丁統領來營借糧無以應之皇然去申刻  
忽報法兵大隊援宣光犯左育已與劉軍接仗劉軍地  
雷轟斃百餘人槍斃百餘人敵猶未退亟派差官謝泣

國走探又令魏雲勝帶隊四百人馳助未行旋報劉軍  
已潰淵亭走浪泊謝泣國半途折回探聞法兵衝破吳  
鳳典李唐營黃守忠紮對岸爲法兵大隊所隔不能抄  
救左育已失雲軍尙有在地營者先是彥帥屢函余與  
丁統領謂法援將至我軍零布城下苦戰力疲腹背受  
敵不能當新寇宜退紮深山老林相機而動等語余心  
諱之猶冀淵亭全師扼左育養銳未戰左育扼定則宣  
光坐困可克未肯遽退今左育失則疲軍誠不能禦生  
敵且軍中苦糧不繼而龍州牧馬後路岌岌可危餉械  
運往百色又遙遙莫能接應實有不得不退之勢矣乃

函丁何詢進止未復黎明李文忠報丁軍城下各營已  
撤請示退否始令先鋒營一律撤退併歸大營先載傷  
卒走三江口同霑化十七日午刻自率親兵陸行令四  
營從容拔退

十八日遇丁統領於道席地歛歛宿北埔十九日抵霑  
化各營續至仍紮霑化丁軍初紮寒猛繼回中門總何  
軍在清水溝尙不得劉軍消息稟彥帥電香帥請示進  
止云牧馬喫緊與其再攻難得之宣光不如退保未失  
之牧馬以捍歸順淵亭回駐同安總信來怨黃守忠包  
抄不力坐視不救稟請彥帥參劾守忠因是革職十八

日過寒猛晤守忠知淵亭此敗必歸罪守忠約其同出  
牧馬守忠深感願行余並約淵亭赴桂邊就餉械整軍  
雪恥淵亭復書曰然又以重遷爲憂景軍新募中營護  
餉未到礮營取道保樂抵那香僅運到小開花礮二尊  
然已費盡氣力矣

正月二十五日電香帥聞南關不駐營甚駭中外知有  
鎮南關而不守可乎崧請往紮南關再議後圖何如祈  
示崧省又電香帥十九電調黃歸崧茲再詳陳黃守忠  
泣訴左育之役非不顧主將亦非彼軍先失營壘包抄  
不到乃爲敵後隊截住劉挾嫌諉罪捏稟彥帥參劾官

不足惜劣名可羞誓死依崧圖功贖罪不允則入山去矣其死士二百人俱願爲主雪恥依劉則散泣涕求收查劉黃久不睦今不可再合黃去而之他恐其黨爲亂使功不如使過乘其急而救之不敢謂必奏功决必能苦戰惟用黃當徑與劉分詢尚有八百人月給五千足養之如蒙曰可乞檄黃依崧爲選鋒徑調出不必防劉

怨崧宥

正月二十九日接彥帥來書極以我軍退保牧馬爲宜並已據情入奏本日先開兩營所有退宣光旋牧馬香帥電報電奏及電

旨錄後香帥正月二十六日電唐主政十九電悉頤足  
歎恨天不殄夷夫復何言貴部自以保牧馬爲是可與  
桂軍聯絡且饟械後路較便再圖後舉惟以後雲軍劉  
軍信息均難通能改籌一路設站否但更糾遠奈何黃  
守忠能招之來牧馬尤好速圖之不知彼須候劉檄否  
貴軍一切可便宜從事洞宥又正月二十七日電唐州  
判飛遞唐主政轉岑宮保援至劉挫宣圍竟解頓足歎  
恨不審尊意如何布置或再進或緩攻雲軍今紮何處  
連日龍電寇將攻芫封圖牧馬唐軍糧彈俱乏維卿恐  
後路斷請示防牧馬徐圖共舉所慮自是實情惟前敵

洞未深悉已屬請公示祈飛速酌定飭遵即復洞沁又  
二月初一日電岑宮保唐主政正月二十九日電奏云  
疊據唐景崧報饑彈缺乏牧馬局徙避鐵廠後路阻絕  
請回防牧馬等語查宣光勢難再攻牧馬寇所必爭接  
潘撫電尤封已有賊蹤前因南關被擾龍局將唐軍饑  
彈改解百色此時唐軍孤懸霧化無益後路饑斷彈乏  
其軍必潰惟有速回牧馬助桂爲妥已飭速商岑督但  
左育既擾道路難達並令酌量情形若事急即速救回  
牧馬馮旣援廉唐回助桂先議守徐圖攻似爲穩便請  
代奏之洞肅艷等語鈔稿寄維卿轉彥帥洞朔正月二

十九日電

旨彭玉麟等電奏欽廉防務緊要請急調馮子材率十營回援欽廉以八營紮上思州隘段相機策應等語又據李鴻章電稱接龍州電聞法進紮扣波由芒封進窺牧馬欲盡取越境等語敵勢兇狡粵西兵單馮子材一軍能否調回著彭玉麟等與潘鼎新會商妥辦前有旨令鮑超迅由開化便趨保樂力顧牧馬一路著岑毓英飛咨該提督兼程前進擇要扼防毋稍延緩聞法救宣光劉永福軍潰退丁槐等亦退紮尙未據岑毓英電報殊深懸系著即確查速奏並飭各統領扼要堅守與潘

鼎新各軍力固邊疆門戶毋稍疏虞欽此二月初二日電

旨岑毓英張之洞電奏已悉官軍攻宣數月血戰多次將士損傷卒爲援寇所撓實堪憤恨現在各營退紮岑毓英當飭統領等擇要扼守竭力維持整頓候有機再圖進取張之洞電稱唐景崧軍宜速回牧馬助桂著該督等妥籌進止馮子材軍應否調回亦遵前旨與潘鼎新商辦欽此

二月初一日先開兩營初二日自率兩營由霑化起程初四日至那香傷卒扶行頗遲初九日抵蘇街中營已

來並礮軍共六營小住聞法人鐵甲船二隻到廣東北  
海電詢香帥前有增足十營之諭尙准增否接香帥正  
月十九來電法聞我南洋五六船將出分臺北六艘將  
來尋我船並鐵甲一二正月初一日遇我二艘於浙洋石  
浦均爲彼魚雷所毀十五攻三船於鎮海戰三刻招寶  
山礮臺助之臺船中敵五六礮敵退我軍亡二賊斃二  
十七十七日又來攻礮臺擊傷一艘立退餘船皆中我  
礮亦退分泊舟山銅沙金堂一帶我船無恙洞暗後聞  
此電情形不甚確又恭閱電報本日

上諭劉秉璋奏鎮海口岸獲勝情形一摺正月十五至

十九日敵船屢撲海口岸經提督歐陽利見督率水陸營勇及輪船管帶各員合力轟擊將敵艦迭次擊壞敗退尙屬壯勇可嘉著劉秉璋仍飭在事各將領嚴密防守毋稍鬆懈其尤出力之同知杜冠英副將費金綬守備吳杰受傷之軍功周茂訓均著存記彙案請獎欽此  
二月初七日電香帥丁槐書來謂彥帥准劉赴桂增募彥帥函云左育潰後士卒僅存數百崧訪聞近似故力屬入關增募否則黑旗亡戎心快惟此人不用則已用則宜明定餉章與官軍一律不可聽其自便不識艱難全其令名崧所深願崧

恭錄二月初九日

上諭廣西關外各軍上年十一月及本年正月迭有挫失巡撫潘鼎新身爲統帥雖身臨前敵並受槍傷惟未能策勵諸將力圖堵禦實屬調度乖方潘鼎新著即行革職前福建布政使王德榜赴防最早未立寸功前在豐谷遇敵挫退南關失後又未能迅速赴援實屬恆怯無能著即革職聽候查辦蘇元春屢著戰功任事勇往著督辦廣西軍務廣西巡撫著李秉衡暫行護理欽此  
又二月十三日

上諭潘鼎新電奏各軍屢戰大獲勝仗等語本月初七

初八兩日敵兵在鎮南關外分路進攻馮子材王孝祺  
立卽迎擊蘇元春與蔣宗漢率師馳援各軍合力堵剿  
大獲勝仗殺傷千餘名奪獲象馬並槍礮多件當將敵  
兵擊退將士奮勇可嘉著蘇元春李秉衡優給獎賞以  
示鼓勵欽此同日電

旨潘鼎新電稱初七初八勝仗本日已降旨宣示所獲  
象隻准其解京出力各員蘇元春李秉衡查明請獎王  
德榜東路獲勝情形並著查奏該軍已飭蘇元春接統  
如敵軍東犯各軍應如何互相援應力保疆土著蘇元  
春調和將士悉心布置毋稍疏虞欽此

二月十七日抵牧馬接芷菴報南關連日勝仗又報十三日官軍克復諒山法人大挫斬擒千有餘人傷者不計楚軍奪獲槍礮逼碼番銀馬匹尤多馮軍追駐觀音橋蘇軍楚軍相繼逐寇駐紮谷松琴帥出關駐駢驥是捷也法人膽落北甯河內大震束裝登輪豫備逃遁

二月在牧馬聞龍州電報澎湖於本月十五日法人攻據之接香帥電准增四營以劉仁柏義臣爲副前營管帶邱啓標發庭爲副左營管帶任定元仲山爲副右營管帶李文忠國卿爲副後營管帶擬募成繁新街規取

太原

二月在牧馬命越官梁俊秀籌糧太原客勇頭目梁正  
理何三謝一等紛請願隨效力爲前導香帥奏以黃守  
忠歸我得

旨允准飛催黃守忠帶隊前來恭錄本月十七日電

旨據張之洞電陳左育接仗各情並稱黃守忠驍勇等  
語黃守忠著准其隨同唐景崧助剿現在諒山已克法  
受大創必圖報復新加坡電報有法船運水陸兵往東  
京之信我軍必應穩紮穩守蘇元春等不得恃勝輕進  
致有挫失鮑超由開化趨保樂著岑毓英蘇元春互相  
知照一俟鮑超到防伺路喫緊即會同援剿總期彼此

策應自立於不敗之地再圖進取欽此

二月在牧馬知丁統領槐於正月

簡授貴州古州鎮總兵恭閱邸鈔十年十二月二十七

日

上諭前據都察院代遞翰林院編修潘炳年等奏張佩綸等僨事情形給事中萬培因奏張佩綸諱敗捏奏濫保徇私各一摺迭諭左宗棠楊昌濬查辦茲據左宗棠查明具奏張佩綸尙無棄師潛逃情事惟調度乖方以致師船被毀且該革員於七月初一日接奉電寄諭旨令其備戰初二日何璟告以所聞謂明日法人將乘大

潮力攻馬尾該革員並未嚴行戒備迨初三日敗退往來彭田馬尾之間十五日始回駐船廠其奏報失事情形摺內輒謂豫飭各船管駕有初二日法必妄動之語掩飾取巧厥咎尤重張佩綸前因濫保徐延旭降旨革職左宗棠等所請交部議處殊覺情重罰輕著從重發往軍台效力贖罪何如璋被參乘危盜帑查無其事惟以押運銀兩爲詞竟行逃避赴省所請革職免議之處不足蔽辜著從重發往軍台效力贖罪何環張兆棟辦理防務未能切實布置業經革職免其再行置議提督黃超羣道員方勳前據張佩綸奏危險堅持出奇設伏

截殺多名是以降旨獎敘茲據左宗棠等查明該提督等紀律不嚴已可概見朝廷賞功罰罪必期允當黃超羣著撤去黃馬褂方勳著撤銷勇號以昭嚴實已革游擊張成身充輪船營務並不竭力抵禦竟敢棄船潛逃雖此次馬尾失利不能咎該革員一人惟該革員有統率各船之責玩敵怯戰亟應從嚴懲辦張成著定爲斬監候秋後處決解交刑部監禁左宗棠楊昌濬於奉旨交查要件自應切實詳察覆奏乃所奏各情語多含糊於張佩綸等處分意存袒護開脫軍事是非功罪關係極重若失事之員懲辦輕縱何以慰死事者之心左宗

棠久資倚畀夙負人望何以蹈此惡習著與楊昌濬均傳旨由飭嗣後大員查辦事件務當確切查明據實陳奏用付朝廷實事求是至意不得以或查無確證或事出有因等語依違兩可含糊覆奏自干咎戾憲之欽此二月二十日電香帥咸電謹悉遵飛致淵亭劉此際以增募自強爲主前勸來牧馬今再促之桂軍乘勝取北寧松請往攻太原越官梁俊秀原籍龍州係高平太原之豪得其助越民易呼應須小有津貼以便從公多福府金英縣民俱請崧往勦願籌糧此外可一檄響應候

示遵崧號

二月二十二日電香帥華人梁正理聚游勇數百經崧  
飭安分據稟現駐新街不敢擾民候調遣太原民稟如  
崧軍往有八十社每社願月以十金供正理餉另供糧  
又有何三謝二正理願招集一處若輩流蕩擾民則官  
軍夫糧爲難撫之便須畧有所給方受部勒往太原不  
重克省期收拾人心虜自窮馬陳六營可併蘇一路與  
蘇馮併規北甯力乃厚但太原不復恐中路終難飛渡  
而逼北甯故崧請往太原崧養又電香帥十七日電

旨恭悉承示分別速復竊意諸軍挫虜復城乘勝進取  
民心軍心就此大震此機不可失但迭次力戰不無損

折且慮糧械乏穏繁再進亦善前各軍奮勇迫於罪無  
可追路無可退今局面一更恐未必歷久心志皆齊當  
以調和諸將爲要義鮑軍自應協潰若入桂則應往海  
陽我多一路兵敵分一層勢崧得十營合黃軍可獨任  
太原料理有緒卽拔隊崧養

請纓日記卷之七終

請纓日記卷八

灌陽 唐景崧 維卿

二月在牧馬二十七日四鼓接芷菴函報香帥二十四  
日電已有

旨停戰撤兵等語不勝驚訝亟披衣起閱電曰蘇督辦  
馬幫辦李護撫台王藩台王鎮台唐主政岑宮保鮑爵  
帥雲南撫台頃據總署二十二日來電本日奉

旨法人請和於津約外別無要求業經允其特請約定  
越南宣光以東三月初一日停戰十一日華兵拔隊撤  
回二十一日齊抵廣西邊界宣光以西三月十一日停

戰二十一日華兵拔隊撤回四月二十二日齊抵雲南  
邊界臺灣定於三月初一日停戰法國即開各處封口  
已由李鴻章分電沿海雲桂各督撫如約遵行惟條文  
未定之前仍恐彼族要挾背盟伺隙卒發不可不嚴加  
防範著傳諭沿海各省將軍督撫並雲南廣西督撫及  
各路統兵大臣督飭防軍隨時加意探察嚴密整備毋  
稍疏懈是爲至要欽此著即轉電雲桂等語洞謹轉敬  
二月二十八日接彥帥來書知雲軍於一月初八日與  
法人戰於臨洮府大破之戰情見彥帥二月十二日電  
奏法大股六千上犯臨洮府復分兩枝一北趨珂嶺安

平一南趨緬旺猛羅抄我後英飭李應珍岑毓寶扼北路王文山等扼南路親督覃修綱扼夏和清波中路王文山進據緬旺各路營官在象山梁支燕毛等處遇賊戰皆有斬獲賊遂併力臨洮二月初七日賊四千圍臨洮存洱社由義埔各營李應珍伏壘堅守覃修綱以精銳馳援初八日援至應珍突出與韋雲清沙如珩俱負傷擊陣斬五畫二三畫一二畫各二員法兵千餘賊仍拒諸軍夾攻戰至夜賊大潰斃白衣法兵二百餘紅衣法兵四百餘紅白洋帽四百餘圖籍甚多均解營驗令馘裨四百餘紅白洋帽四百餘圖籍甚多均解營驗令馘

分懸雲越示眾我軍亡三十九員弁勇傷百二十餘傳  
言戰死法公使一法酋七尙未探確現督師進剿請代  
奏毓英肅文此捷在克復諒山之前時宣圍已撤關外  
無站文行內地捷報入京已在議和後矣

二月二十九日接香帥二十四日電岑宮保唐主政頤  
接總署二十二日來電本日奉

旨是日已將停戰日期諭知岑毓英矣現拒撤兵期近  
劉永福一軍必須妥爲安插將來或在邊界屯軍抑或  
別籌調度該督務須熟思審處先行奏聞候旨定奪欽  
此卽轉電岑督等語洞謹轉查劉事前接彥帥電並咨

已飭永福赴桂邊募勇助剿電知維卿現在彥帥如何  
辦法請電示鄙意此人萬不可棄以快敵爲粵扼邊亦  
甚好或欽州或思州或龍州皆有用擬詢劉所願方爲  
妥協請彥帥卓裁卽賜復維卿並卽酌覆洞敬同日又  
接香帥二十五日來電岑宮保蘇督辦馮幫辦李護撫  
台唐主政劉提督永福洞三次電奏諒山暫緩撤兵  
嚴旨不准貴軍卽欽遵二十二日電

旨依限撤兵勿誤洞宥卽函淵亭來桂再議電復香帥  
香帥三次電奏錄後二月二十二日電奏頤閱西人密  
報海防來電北甯危急特撥該處軍士數百名前往救

護又接法電新換外部又辭職等語至法提尼格里斃  
洋電久傳現因梧州綫阻前敵自十六後無信來惟前  
接馮電法遁北甯分軍追剿此必是馮軍進攻北甯馮  
三次出關威惠素孚越官民多爲耳目近大勝後越人  
必多響應連日西電俱言法願就款俱照津約不知確  
否萬一實有其事伏望詳酌總之非有諒山龍州無險  
不能守愚昧瀝陳恭候

聖裁請代奏之洞肅養又二十三日電奏條約未定萬  
萬不可撤兵臣之洞謹昧死上陳懇

聖明熟思請代奏之洞肅漾又同日電奏頃北洋電和

議已畫押奉

旨撤兵竊謂停戰則可撤兵則不可撤至邊界尤不可  
關外兵機方利法人大震中法用兵年餘未有如今日  
之得勢者我撤敵進徒中狡謀悔不可追桂邊必扼諒  
山外谷松觀音橋等處若棄諒及高平法必屯兵沿邊  
無險無從防守欽廉亦逼兩廣永與法爲鄰以後兵力  
餉力難支且電綫斷數日連日雷雨忽通忽阻前敵遠  
難速達初一停戰斷難接到糧械繁重十日亦難撤至  
界伏望展限詳議令彼撤基隆澎湖之兵我方可撤看  
北甯能否攻克再定若得手更易商邊事重大迫切上

陳伏候

聖裁再正發電間接馮十九電擬於二十一日親率本部並王孝祺軍攻郎甲繞襲北窩洞昨聞法調海防兵往助尙催馮添兵援勦並飭欽州進兵欲停不及只可俟續報戰情再請

旨請代奏之洞肅漾

三月初三日接香帥二月二十五日電李護院蘇督辦馮幫辦王鎮台唐主政岑宮保總署二十五日來電本日奉

旨撤兵載列津約既允照津約兩國畫押斷難失信現

在桂軍復諒法即懼蘇馮王若不乘勝即收不惟全局敗壞且孤軍深入益無把握縱再有進步越南終非我有而全臺隸我版圖援斷餉絕一失難復彼時和戰兩難又將何以爲計且該督前於我軍失利時奏稱只可保境堅守此時得勝何得不圖收束耶著該督遵旨亟電各營如電信一到即發急遞飛達如期停戰撤兵倘有違誤敵生他變惟該督是問欽此即轉電雲粵督等因所有雲粵各軍停戰撤兵日期望謹遵二十二日電旨辦理李護院速發急遞飛致蘇馮王唐岑劉欽遵接此電後即賜復爲要洞宥

彭雪帥電奏請飭統兵諸臣仍紮原處二月二十六日  
奉電

旨彭玉麟奏請飭統兵諸臣仍紮原處等語撤兵係照  
津約斷難失信已將辦理此事全局利害諭知張之洞  
著即給與該尙書閱看自可了然然自撤兵回界仍係  
整軍嚴防彼族即挾詐背盟我亦有備無患該尙書等  
惟當懔遵前旨迅速辦理欽此

香帥二月二十五日電奏保諒不可讓法桂全邊廣欽  
廉二千餘里皆設防營礮臺斷無此力如初議難改竊  
有一策請

敕總署北洋速告法廣州至龍綫壞數段洋匠少難速修岑軍距龍二十五站宣光撤圍後雲桂臺站已斷前敵難速達此本實情越地停戰宣光東西各展限十日或半月馮提現率王孝祺軍規北甯馮素得越心習越地越人多通消息此次法人入關疑馮有內應以匪教居後法兵居前故真法兵將傷獨多遂大潰遁馮首倡出關諸軍從之越人響應今他軍尙屯谷松之後馮軍獨前進深入王軍肯同馮進其故可想聞李揚材之弟現在北甯城內與馮通信如此事機兵勢不爭可惜可否特

敕馮加以褒獎如能於十日內攻克北甯許以爵賞軍士及越官民破格優保重賞

敕蘇酌分軍助之

敕岑進兵牽敵萬一能克河內必震法更餒可以北甯換保諒全局俱振洞不敢謂必克特以大局安危人事宜盡若蒙天助或冀成功區區愚慮血誠有一線可爲不敢不竭力伏候

聖裁懇電

旨速行請代奏之洞肅有

恭錄二月二十七日電

旨張之洞電均悉中國素以信義爲重法已電孤拔於  
三月初一日停戰開臺灣北海封口並令在越統領定  
期停戰若我失信致生他變不特兵連禍結且爲各國  
所不直嗣後交涉事件益形棘手電綫中斷二十五日  
已由總署告知赫德以雲桂電信恐難速達展限二三  
日令其電法斷難再與議展若此時復飭進兵此等舉  
動豈中國所可爲幸而獲勝尙覺得不償失一有蹉跌  
更傷國體該督近接岑毓英電報是電綫已通正宜迅  
速傳達務當懔遵嚴諭飭令防軍如期停戰撤回邊界  
並仍整兵嚴備以防不測方爲正辦儻有違延朝廷固

必嚴懲而貽誤全局該督返而自思諒亦不敢出此懷之慎之該督於奉旨欽遵後即電聞欽此

恭錄三月初一日電

旨張之洞電奏馮子材探法新兵到定二十八日大舉攻諒虛實難測請訓示諸將進止機宜等語停戰期前法如進犯自應盡力堵剿停戰期後如彼前來攻撲該防營偵探確實即由將領照會法兵官告以現已停戰毋再進兵儻彼置若罔聞仍來撲犯即行實力剿辦一面將照會原文即電總署存案庶不令藉口我先開戰別生枝節欽此

三月初五日接丁統領函云淵亭仍欲戀保勝並云劉  
黃不睦久未晤面接香帥電唐主政款局雖定邊防難  
撤貴部所添四營仍速招如有願用良將而在他營者  
可向李護院求之洞已電致矣黃守忠速調率所部來  
有信否今籌安插劉永福洞奏請令屯思欽一帶統三  
千人捍邊歸馮調遣粵給餉械望速催東來緣此次和  
議撤兵止於邊界劉若在越亦必爲法併官軍不便援  
助惟有附粵屬馮爲長策永爲國家守邊大將亦甚壯  
偉可屬淵亭率所部來桂邊募足此數詳議屯紮處所  
正發電聞已奉電

旨允准速達岑劉即復洞歌

鑑帥三月初五日電奏瀘桂廣三省皆與越接壤滇以  
互市重廣以海防重桂以守邊重桂與越界自小鎮安  
歸順州下雷龍英安平上下凍憑祥思陵思州各土州  
以達龍州上思自南至東絲延一千八百餘里厯鎮安  
太平南甯三府所轄計大小隘共一百數十處犬牙相  
錯歸順出牧馬鎮南關出文淵思陵出那陽下凍出瓦  
封皆近年行軍大道如山上思出十萬山通北海至海  
陽等類則又不可悉舉現遵約桂軍還紮邊界如將諒  
山高平越境悉聽法屯兵則桂防處處可虞敵或渝盟

瞬息壓境我將何之似不能不豫籌限防秉衡博采眾論擬請在諒山高平一帶之地仿古之歐脫兩國皆不置兵聽越民雜處俾我與法隔既免時起衅端遇事較可措手請總署代奏秉衡謹肅歌

香帥電奏已委州判孫鴻勳赴越諭雲軍劉軍撤回界事畢委員偕劉入越蓋此時法人惟恐中國電斷不能達滇退兵乃由赫德派洋人吳得祿偕廣東委員乘輪赴越傳撤兵之信於雲軍劉軍也

三月初六日接香帥電李護院唐主政岑官保馮幫辦總署初五日來電本日奉

旨張之洞電奏擬令劉永福統軍屯紮思欽一帶等語  
所籌尚是著該督與岑毓英商辦欽此轉電雲督微等  
語請彥帥妥籌指示辦法並檄劉速來請維卿速遞彥  
帥善致淵亭洞魚

香帥三月初二日至二十二日電奏錄後三月初二日  
電奏兩廣各軍

諭自己到雲亦必達法又代遞臣之洞未敢違延當蒙  
聖鑒惟緊要數端必應早議一我雖撤兵彼亦不得進  
兵宜紮原處目前游勇甚多設生事我難任咎一東則  
諒山高平廣安西則保勝凡與我界近之地宜作爲甌

脫雖法保護仍不得屯兵築礮臺以免逼近生衅一基  
隆澎湖宜令即退以爲和好實據一津約但言於法商  
務極有益宜增爲中法商務彼此均有益以昭平允一  
自去年開仗以後停戰以前中國毀傷法人物業應勿  
庸議去年粵會照會法及各國領事一既不礙華體面  
須載明聽越朝貢一劉永福無論安置何處劉若不攻  
法法亦不得尋讎再論以上七條請

敕北洋赫德速與法議此乃津約未備赫德疏漏與津  
約並無翻背理當增補近體察法領事情形惶急殊甚  
急盼停撤稅司言雲桂軍雖停戰但恐劉永福進攻蓋

永福敗衄詳情彼族不知尤宜護惜藉以捍敵務宜呈商尙可補救一二乘此撤兵限內我雖守信彼或慮變較易商量事半功倍若我兵已退彼軍漸集據要養力更難爭論機不可失悔不可追懲懇

聖鑒請代奏之洞肅沃三月初五日電奏接總署電申法約定撤封口後彼此勿運赴臺兵勇軍火不勝焦灼疑惑既禁濟軍所謂撤封口何事若僅通各國商船與我何涉連日赴臺法船絡繹何一不運孰能查阻不過禁我而已然則赫德所議我撤越軍彼開封口之說皆屬虛妄臺澎不撤已不平允今並日亦不開是中國坐

愛欺詐實可痛憤數月後臺則彼足我耗越則我退彼進設有要挾臺既難守越亦難攻竊恐其基隆終難全還必有踞礮臺屯水師之謀懇

敕北洋速與法商令將臺口即日認真弛封以符原約並令勿添兵來華告以彼不開口顯然背約越地將帥聞之必皆憤怒撤兵必不能速以此爲詞及早力爭大局幸甚請代奏之洞肅歌同日電奏馮二月十七至二十九電畧言自克諒後客教離散法匪屢驚穩守不如速戰令欽軍襲廣安令麥鳳標等逼卽甲約蘇軍牽制船頭擬二十五親往進攻北甯密布內應河內亦有布

置郎甲一克北窰自潰並以鉅金約定西貢內應又稱  
彼兵不撤我退彼進長慶諒山仍爲彼有緩兵奸謀前  
車可鑒如再被欺材實不甘當率三軍與之從事等語  
李謾撫電馮獨不願撤兵已連函勸之等語查唐景崧  
二月十七至二十二電畧言十七到牧馬擬即進駐新  
街攻太原高太勦撫使梁俊秀能呼應可爲助多福府  
金英縣民俱請往勦願供糧梁正理聚游勇甚多據太  
原請受景崧調遣太原民八十社願集餉籌糧供梁軍  
又有何三謝二皆可招已調黃守忠軍請獨任太原一  
路等語蘇二十七電聞鮑軍抵距龍四站之歸順州已

飛請來助等語查二月以來桂軍捷於東雲軍捷於西  
唐景崧由中路規太原官民游勇響應鮑軍已近桂邊  
欽軍已備進剿劉黃部眾尙強若乘勝四路進攻敵援  
未到黨畔防虛應接不暇甯化太原必有兩處得手誠  
爲厯年未有機會今諸軍皆撤馮朔電亦遵限停撤鮑  
軍已遵

旨電阻特近日越地軍勢民心不敢不以上

聞以備議約操縱請代奏之洞肅歌三月初六日電奏  
津約第一條中國南界毗連北圻法國約明無論遇何  
機會或他人侵犯均應保全護助查去年此約法人本

意指劉永福言法恐劉爲患欲中國助彼禁劉洋人所謂保護皆謂主其政令用兵攻剿並非善意惟旣有均應字樣自是中法均可同任保護然則北圻地方中國確可與聞不得專歸法保護明矣洞前奏請作爲甌脫禁彼勿屯兵築礮臺正符前約務懇

敕北洋力爭關繫雲粵三省邊防甚大再北洋如能別思一策令於法人商務別有利益婉商換回保諒高平廣安尤善換回者非我占其地也地仍屬越專歸中國保護而已洋例兵爭得者不讓入今諒高兩省及宣光以西館司沿江以上皆我兵力所取法兵力所不及法

不應無故占踞若以此措詞而與以他項利益以商換之或冀就範亦未可知津約並無北圻全歸法之語洞所陳皆未稍背原約至無論遇何機會語太含糊必應議妥寫明免後患若地已暗屬法而令我爲助敵剿匪無此情理巴德諾已赴津伏望

聖明熟思早計幸甚再津約三箇月後議詳款此次限以幾月仰懇

諭示以便籌備請代奏之洞肅魚三月十一日電奏二月初密運洋械到粵無彈設法湊墊共配毛瑟一千新林明敦千彈二百萬及槍礮藥炸藥等項二月二十日

委員分解泉廈汕分起零渡茲接廈回文二十九到廈  
密雇船解等語惟初四接總署電約定勿運臺械此械  
發運到廈均在署電先此時必有已行者連日接臺信  
晤臺員皆在澎湖失後云泉州鹿港民船仍可潛渡若  
分多起即或被截所失有限與兵勇冒險不同且發運  
在前彼亦難苛責特署電既言約定未敢有違似宜籌  
一妥法既免枝節又備不虞更善此械是否聽其運渡  
抑飭勿渡請

旨遵行再法電新添兵八千有一半已起程仍來東京  
昨法兵輪一自港赴臺咱廉電初六初七又來二兵輪

泊北海口詭計難測請代奏之洞肅真二月十三日電  
奏頃北洋電連械在前又潛渡即被搜截無妨等語仰  
懇

聖恩凡前已發運者無從追回聽其自然且有商捐自  
運者官無從阻即生枝節北洋亦能辯晰將來基隆恐  
不全還若聽屯兵終爲法有臺百事不缺惟缺軍火彼  
多違約我不可自困若不趕運萬一反覆臺必不支他  
事可讓此事不可讓迫切上陳請

旨遵行請代奏之洞肅元同日電奏乘勝結束

廟謨宏遠實深欽服惟謫寇難防不敢不陳蓋法虜狡

險並不照約一原議彼開各口今臺廉仍封二馮軍郎  
甲初一退兵彼開四礮擊我三禁我濟臺彼船不斷四  
我撤越兵彼仍來新兵四千於廿四號即三月初十起  
程查興化一路岑於二十日後屢大捷奪關復地興化  
垂克越民四應法斂兵保河內北洋電稱已接越酋電  
詰粵獨無寄岑文惶急謬誤如此興化之危可知馮軍  
唐軍雖撤將士皆懷忠憤北甯一路越官黃廷金立忠  
義五大團及游勇紛紛應馮請爲前驅河內消息已通  
客教內畔至太原一路官民游勇應唐前已奏軍勢民  
心幾如破竹似宜乘此機會杜彼狡謀查我所慮者惟

臺澎今我釋越彼不釋臺欺誑緩兵以便要挾實堪髮指擬請

敕北洋作爲該大臣意速商法使言雲桂將帥皆奏請速攻

朝廷不欲改約但法兵不得進紮一步俟詳約定再議且立開臺口我亦不遣兵輪渡臺惟官商民船不得搜查因兩國既和我正屢勝若我撤彼進臺口不開顯不公平允於中國體面大有礙必爲各國所笑於鴻章原議之人亦爲難彼如違約鴻章惟有奏請

敕越進兵矣卽或仍然決裂我縱棄孤懸之臺彼不舍

接壤之越我陸戰可恃諒所深知彼旣無越臺焉能踞等語限法廷即日電覆乘此越曾惶急新兵未到以此爲詞此兩事必不敢不從若聽則越未全踞臺有接濟彼無所挾詳約易商再戰亦易卽不聽亦不過北洋與法商議之詞

朝廷大信無損蓋我重臺彼重越彼經營多年費財無數我陸兵易進又近西貢故全力謀之且無越則法兵無根臺不能久攻津無論也屢次來兵越多臺少敵情可見不然自去秋以來若兵全赴臺臺北危矣北洋爲國家重臣此大局要關伏望

諭該大臣無論如何爲難亦宜盡力早爭赫德但主調停不無左袒不可恃也洞乃欽遵乘勝結束之意正欲和局早定免貽後患洞屢奏緩臺惟有急越今日事勢仍同若越緩則臺終危矣不惟此也欲保臺惟有權詞輕臺奪其所挾怵其所急乃可就範伏祈

聖鑒可否錄洞此電發北洋酌辦請代奏之洞肅文三月十六日電奏蘇電委員自法營回五畫云求驅越南反賊禁黑旗滋事回文亦此數語等語查關外游勇萬計我軍入界越匪豈能代勦招撫亦無鉅貲洞初二日電奏七條曾慮及此劉可調思欽不願從者假名字者

我恐難問馮電問我軍入界諒山交付何人洞復以暫  
諭越官看守此兩事應如何措置請

旨遵行再各軍十一已連環撤退二十一必入關李蘇  
馮電同吳得祿電十一到河內十二赴各營請代奏之  
洞肅諫三月十八日電奏法酋照會請我禁黑旗勿滋  
事驅越南反賊十六己電奏法懾我軍威非去年可比  
但求黑旗不攻法即萬幸無遂劉意法旣無奢望調劉  
思欽之說宜暫祕之劉部久在越有家屬其眾必多留  
越黃旗葉成林等與劉若合若離必不遠徙過眾亦難  
收養憇

敕北洋與法約照洞初六日電奏我兵力所及之地法勿占安置黑黃旗餘眾及游勇免無歸擾法但調劉本部附粵以示格外和好較妥法所謂越反賊卽游勇義團乃近助馮軍岑軍戰及辦糧嚮導者彼之賊我之忠義若不早爭將來責我驅禁理有不可力有不能不敢不先奏

聞請代奏之洞肅巧同日電奏唐景崧電游勇股數太多擾邊擾越擾法均受累招撫編營費太鉅或議令在太原高平開礦自給但越官禁礦華民向有強據竊開者等語查桂邊外游勇無算雲邊情形當同又有黑黃

旗近雲境礦尤多此誠善策不惟棲流兼可捍邊興利  
越官尙易諭遵目前須畧籌費兼籌箱束之方法據越  
必窺雲桂邊防終可憂將此輩設頭目受約束資以軍  
火有變可用不然游勇即爲我患已與李岑商請

敕北洋商法寬留歐脫此事方能辦請代奏之洞肅巧  
三月二十日電奏入三月來法船自港運煤糧兵衣赴  
臺者多起十二日法兵船連運陸營帳棚八十副水桶  
三百六十具赴基隆十八日法兵船渣刁埃王載兵數  
百馬三百匹赴澎湖十三日法船載兵四百到海防馮  
幫辦電十一日我兵退後探知郎甲船頭阮下各法營

俱修臺添礮廉電法船一現仍封口至來華新兵三月初十仍起程者四千前已奏法禁我調兵運械築礮臺濟糧米彼種種違約虞有他變謹奏聞請

敕北洋詰問並

敕臺閩雲桂諸軍勿弛備請代奏之洞肅號三月二十二日電奏西貢報平安輪被擄弁勇除分置各船外發至西貢者二百二十四員名留西貢官弁十五人餘發往普魯堪作工等語前據馮電越地義團多領馮軍旗號助戰或挑漿飯嚮導或分道進攻今軍退恐爲法害深可憫惜等語頃龍探馮入關越民從之者千餘人僉

稱馮紮龍隨來龍紮欽同往欽因其反教助軍法人好殺必被害等語洞屬馮善言撫慰酌賞遺之諭以我即告法勿害查龍州獲法僧五皆善待無凌虐請

敕北洋告法一令將平安船人善待勿遠遣將來彼此換同一約明以前越人從法者我未誅越人助雲桂官軍者彼亦無害洞爲恤軍士繫民心起見是否有當恭候

聖裁請代奏之洞肅養

三月初八日開四營赴歸順守邊

三月十五日在牧馬祭隨征死亡將士班師入關時各

軍俱撤入關蘇軍紮鎮南關中路萃軍勤軍紮平而關  
彬橋一帶在關之右楚軍紮油隘在關之左

三月十六日聞琴帥將起程念琴帥之待余也初小不  
洽余適沈病遂有假歸之請嗣起領景軍琴帥借餉借  
槍函信往來亦頗投合今失意去不能恝然乃遺俸祝  
卿齋函送行琴帥手自復書曰龍州握手馳念至今小  
住河干忽蒙惠翰奉拳厚意感不能忘我公銳志勳名  
備歷艱險孤軍獨立百折不回景佩之餘益深系念新  
一載徒勞無裨時局諒山一役得失分明

朝廷僅予罷歸俾得生還故土

天恩高厚圖報無由毀譽聽之於人是非斷之於己悠悠之口何與身心惟祝我公立志精進宏此遠謨爲書生吐氣是則江上閒人所日夕盼禱者也小舟草此留別不盡欲言

三月十九日抵龍州芷菴率同廣東派到景軍差遣委員中書科中書周其璇知縣曹星佐常壽齡舉人王勳臣府經陳啓鴻縣丞龔瑞時州判張炳榮巡檢李廉從九李大受鹽大使銜李生花繙譯石紹祖五里郊迎接香帥電景軍萬不可紮歸順以近龍州爲要乃定計紮下凍新四營募成正菴耐苦多才性高志潔忌者毀之

辦我景軍後路纖巨躬親公私並理深感不忘當時萃  
軍勤軍劉軍香帥皆倚其一手經理措置裕如以諒山  
之捷保花翎知州本日電香帥密晤開礦安置游勇梁  
俊秀一力承當以爲可行崧雖不遽信未敢恝置之再  
今日要義在將帥有遠謨宏量任大事勿讓遇小節勿  
爭反是不足濟非常之變可憂不僅在游勇崧皓

三月在龍州李護院蘇督辦馮幫辦尹仰衡蔡仲岐李  
蘭生張縵卿許天倬鍾西耘趙漢甫時相往來西耘於  
正月抵龍州與琴帥頗合鑑帥護撫篆意氣參商奏請  
軍務就平回京供職仰衡博學清才刊有抱蠡山房詩

文豪行世亦留心時務舉人官廣東同知保知府天倬  
叔丈年丈之子副榜年少才美竊心愛之

三月在龍州接京寓來電驚聞季弟禹卿病歿痛不可  
言禹卿一字元穎歲入學十七歲中鄉試二十四  
歲入翰林聰穎絕倫跌宕有識議論常出人意表仲弟  
春卿同官翰林二人怡怡讀書春卿專攻經史禹卿則  
泛覽羣籍講求時事余在都搜訪越南情形半得禹卿  
力也有志無壽僅分校順天鄉試一次歿時僅三十二  
歲癸未擬有集款興屯之奏未上寄橐來營附記於後  
奏爲集款興屯裕邊持久敬陳管見仰祐

聖鑒事竊越南亂離日甚仰賴

天朝救護籌兵籌餉勞費不資近日越事愈棘王亡國破談邊務者率以多增兵饑爲言第值

國計維艱偏災屢見動須籌款豈屬易易伏念

皇太后

皇上旰宵廑系南顧殷憂苟有一得之愚謹當披瀝上陳以備

採擇查越南地廣人稀北圻如諒山太原高平興化宣光等省極多沃土尤宜穀性天氣暄和四時可種該國人民既少兼習於游惰蕪穢不治遂成棄地華人在彼

開墾獲利甚鉅其受田之法向該國地方官承領給以地券約十餘年後酌議升科賦稅亦薄厯來辦理具有成例該地一歲恒再熟三熟計一人耕可獲十餘人之食數千人耕即可獲數萬人之食利源甚大若興屯政即農即兵除自給外尙有羨餘可佐軍需及開田工本之利惟是創辦伊始則有田器牛畜籽種及給予工食各費農訓爲兵則有軍火器械及頭目薪水犒賞傷卹各費諸非籌款不辦公款難籌請籌私款大宗莫如招股查中國招商局久奪洋人之利亦由眾擎易舉數百萬毗嗟可辦然近日開煤鐵礦招股亦覺稍難則華

商之力绌也惟華商之在外洋貿易者招股猶易南洋各埠如新嘉坡檳榔嶼等處華商富者極眾前廣東舉人溫宗彥曾充招商局員到彼招股並辦直隸賑捐集資甚鉅他如花旗之金山日本之橫濱暹羅之濱角皆屬華商聚集招股必屬易成是在辦理得人則去其害而全其利人自樂從招股宜擇地設局凡出入各款詳細造冊刊刻成書年終概行給閱以示至公其攤股較鉅者即令入局司事大致仿招商局辦理此外如有官紳入股亦可照辦屯務關係邊防至重現值度支告匱廟算憂勞之日必有勉力輸將者況並非一出無入尤

應樂於從事此籌集私款之大概情形也招募屯軍宜用邊關附近之人既悉地形更服水土流民散勇健者即可充役編以卒伍束以號令無事則爲農有事則爲兵考前代備邊代興屯政漢屯廣武卒破先零魏屯淮上遂困吳國隋屯朔方而突厥吐谷渾不敢窺邊元屯粵徼而蠻寇以靖所謂無勞費之苦有守禦之備坐困強虜明效可徵其餘營田積穀頓致富強尤爲史不絕書或行之有弊者緣名在而實亡而固非屯之無益也今法夷蓄志南藩軍事斷難遽止中原坐耗詎有窮期在

朝廷軫念藩邦勤求邊計原不惜重費以贍軍貲第遭  
際時艱續濟之款方窮持久之謀愈絀惟亟興屯務則  
足食足兵節省實多戰守兼資商民交利洵籌邊之要  
務經國之遠圖也顧興利而不究其害必有虞滯礙難  
行者臣請剖而言之或謂開墾致擾越境越人或未必  
從不知設屯即以設防也現滇粵防軍仰食該地將毋  
悉索敝賦我自種之而自食之彼既不勞於供億更能  
倍入以租糧地界清而爭土無虞稅額定而逃徵弗苦  
是則善於經理則諸弊可除何慮不從或謂越南戰事  
方殷孰肯以有用之財擲諸可危之地則招股難不知

諒山太原高平興化宣光等省近在邊隅無異内地現  
滇粵防軍所駐山西北甯等省遠包於外該各省尙在  
其內爲夷人足跡所不到且平原沃衍亦非用武之區  
屯務一興人實其地且耕且守尤屬外侮無虞則非孤  
注一擲可比也或謂商人重利豈以有餘之息急公義  
而濟軍儲不知夷埠保護商民兵饟其費多取於商屯  
軍爲

國家捍禦亦即爲商民捍禦也取諸商仍用諸商爲公  
計則有急上好義之名爲私計則有謀利守財之實一  
舉兩得激勸易施前代屯邊若漢之輸財明之易鹽均

有藉諸商力者目今中外互市商務尤盛彷而行之事必倍易或謂開田有費饟軍有費則本大而利微招股亦難不知該國自諒山西北迤邐達於興化宣光等省沿邊殆千餘里擴而充之如附近山西北甯及東南濱海之廣安海陽各省又不下千餘里除深山密箐該國民人自墾之地外約得地數千頃臣謂一人耕可獲十餘人之食者猶從其少而言也論其一歲屢熟荒地倍收計萬金之費可墾二十餘頃之田一頃歲收五百石二十餘頃約歲收萬餘石子母兼權幾盈倍蓰饟軍而外饒有餘息可以照股均分當較招商局獲息爲尤旺

是貴長於綜覈則汰冗費以植利源獲益自鉅待擴至數千頃邊計不足憂矣或謂墾荒爲熟訓農爲兵都無速效不知功以積漸而成事以並行而易即墾即耕農隨地可獲也即耕即屯兵隨時可練也一事有一事之效一時有一時之效積小致大勢有必然且及今而爲猶虞已遲及今不爲更將何望與其耗無窮之

國帑而接續爲難何若裕不竭之軍儲而遲回終就所謂河海起於一勺泰岱基於寸壤也惟是招商一節似招商局可辦而招商局員或未能辦自非曉然於公家利益所在因善用其激勸者難望有成屯田一節尤虞

辦理不善致擾越境滋生事端若二者統歸於邊關將吏則招股既恐無人而耕種訓練事務繁多目前戎馬倥偬斷難兼顧若數事分派數員則節目不相聯屬措置必難裕如非專員董辦之不可古昔屯田多設專官應仿而行之略如船政之制名曰屯政雖係招商然究屬國家公事無不可派員之理也竊意此舉一行不費絲毫

國用而兵強饑裕可支長久夷虜不足卻邊患不足平矣臣爲裕邊持久起見恭摺瀝陳伏乞

皇太后

皇上聖鑒訓示亡弟此疏擬於山西北窩未失之前寄  
商可否維時邊事日緊止其緩陳遂不果上其議若行  
之五年前誠爲善策邊防有資蓋越圻曠土實多游民  
且眾而集商股設專官尤爲認真舉辦之要術非此則  
仍苟且而無實際也越難甫興粵西即議辦屯田以收  
游勇而裕軍儲於是停邊營夫價擬集爲開墾之費因  
軍務緊而不暇行惟今日中外用兵有異於古以農爲  
兵誠不易言亡弟心神曠遠立志匡時閱歷再深自必  
益有見地錄存此彙畧誌一斑而已

三月二十五日接香帥電岑宮保鮑爵帥李護院馮督

辦蘇督辦唐主政總署二十四日來電本日奉

旨彭玉麟張之洞十九日電陳各節均悉前因蘇元春  
屢著戰功張之洞亦稱爲良將特派督辦廣西軍務其  
時馮子材一軍先經彭玉麟等請調欽廉辦防本未令  
歸蘇元春調度馮子材威望素孚卽著督辦欽廉一帶  
防務蘇元春著仍督辦廣西邊務至一切善後事宜著  
李秉衡與馮子材蘇元春會商妥籌奏明辦理數月來  
雲桂各軍奮勇打仗疊獲大勝深堪嘉尚岑毓英仍當  
督率各營嚴申儆備勿稍鬆懈其粵東西各軍著張之  
洞調和將帥以資得力如有齟齬貽誤等情惟張之洞

是問劉永福一軍著即調繁思欽一帶該軍到防後人數餉數張之洞酌定具奏越地義民岑毓英李秉衡隨宜措置朝廷不爲遙制鮑超一軍著暫在馬白關繁營訓練以備不虞俟岑毓英撤兵時一同入關屆時作何調遣聽候諭旨欽此轉電岑李馮蘇敬等語即請轉咨各處並摘劉永福至具奏一段飛速行知劉提督洞轉省

請纓客曰馮萃亭軍門曾督辦廣西關外軍務今爲督辦分亞於蘇嘗悒悒與蘇不合彭張兩公奏聞不知作何語而馮遂有督辦欽廉之

命勳臣老將上勞

宸慮調停能不令人鼓舞而頌

聖明之世哉馮得

首次日即拔隊赴廉州諒山克後諸將爭功至是南皮乃確采戰情會彭倪入奏最爲詳覈錄後

奏爲廣軍援桂規越會合桂省主客各軍力戰破敵保全南關連克文淵州諒山省長慶府觀音橋各城壘及遵

旨撤兵回界嚴防各緣由恭摺詳陳仰祈

聖鑒事竊惟廣東奏派馮子材王孝祺兩軍入越協剿

當於上年十二月奏明在案至本年正二月間諸軍保  
關復諒大挫兇鋒當經前廣西撫臣潘鼎新隨時電  
奏臣等僅於桂電所不及者間有

奏陳惟來電與各路稟報頗多異同深恐或有參差紓  
漏即不足以服將士之心現在款議鑄成邊防尤亟謹  
將詳實戰狀上爲

皇太后

皇上陳之查上年十二月法虜大股自船頭來犯十九  
日攻谷松二十九日陷諒山本年正月初九日入鎮南  
關桂軍將領楊玉科戰歿董履高戰傷諸軍多潰惟蘇

元春所部及陳嘉六營尙完於是法據諒山於關外十里之文淵州築臺安礮爲堅守計龍州爲全軍後路商民驚徙游勇肆掠逃軍難民蔽江而下廣西全省大震自太平南甯以達潯梧皆電報所通水路所達紛紛告急請兵桂林空虛倥偬籌備先是幫辦軍務前廣西提督臣馮子材暨廣西右江鎮總兵王孝祺於臘月先後抵龍而募軍未足裝械未齊王孝祺率數營馳援出關而諒已潰馮子材原有之八營尙在東路僅帶中軍兩營駐龍州元旦聞警乃留一營彈壓根本親率一營赴南關與王孝祺軍攔截潰勇一面調八營來關晤商撫

臣潘鼎新告以守關無須該軍令仍顧東路遂以所部全、繁、關外派站親往督勦初九日南關告警復檄西援十二日聞信折回時法已於十一日焚關自退馮子材素有威惠爲桂越人心所嚮還入關眾心稍定乃建議於關內十里之關前隘跨東西兩嶺閒督所部築長牆三里餘外掘深塹爲扼守計謂桂軍宜稍養銳自任以所部萃軍守之營於嶺半令王孝祺勤軍屯於其後半里許爲掎角當是時幫辦軍務署廣西提督臣蘇元春毅新軍陳嘉鎮南軍俱屯幕府在關前隘之後五里蔣宗漢廣武軍方友升親軍俱屯憑祥在幕府後三十里

潘鼎新率鼎軍屯海村在幕府後六十里魏綱鄂軍屯  
艾瓦防瓦封在關西百里王德榜定邊軍屯油隘專備  
抄截兼防入關旁路在關外東三十里獨廣軍兩枝當  
中路前敵時值北海封口西電皆謂法將由欽廉攻南  
甯斷桂軍後路而廉州並無統將臣等因桂軍漸集擬  
調馮軍回顧欽廉又恐難於移動當經電奏調廉仍令  
馮子材酌度進退緩急一面詢商該幫辦或全移或只  
調兩營或全不移動但聲言即日東援以定眾心聽其  
斟酌因潘鼎新屢電不以馮軍爲得力必不肯言留故  
令該幫辦自酌知其力任大局必有權度旋接潘鼎新

覆電謂蘇元春自芻封調回卽令馮軍回廉馮子材覆電則言該軍喫重兩營亦難移調當卽電復令其專顧桂防不必援廉此正月中旬以後廣軍布置扼守前敵之實在情形也於時馮部全軍已成桂軍休息漸定越人密報法將出扣波襲芻封攻牧馬繞出南關以北且斷唐景崧馬盛治兩軍歸路蘇元春率軍暨魏綱軍趁芻封以待子材遣五營扼扣波以邀之二十七日法數十騎突厥匪至芻封官軍先在驚走扼扣波之馮軍突出奮擊敗遁獲其駄軍火大象一擒匪黨二月初二日法又爭扣波遇馮軍脫洋衣洋帽桂林木而竄芻

封即長定府法以越官長定府知府給己殺其子遂無  
西犯意馮子材請於潘鼎新調蘇軍還中路法揚言將  
以初八九日犯關馮子材料法必於初七日禮拜一出  
兵決計先發制敵羣議多不欲戰潘鼎新以士氣未復  
止之馮子材力爭率王孝祺軍於初五夜出關襲敵山  
有賊壘三安巨礮我軍已入街心自五鼓戰至初六日  
午刻賊益盛王孝祺馬中礮斃易騎戰卒死士由山後  
攀崖而上破其二壘斃賊甚多賊敗走我軍傷亡亦多  
未刻我軍飢疲乃還此二月初五初六兩日廣軍倡議  
出關力戰破壘之實在情形也初七日法果悉起諒山

之眾併力入關直撲關前隘長牆攻廣軍營壘馮子材告諸軍曰法再入關有何面目見粵民何以生爲王孝祺以淮軍爲龍州人所詬病諸軍多輕之憤甚皆誓與長牆俱死法以開花礮隊循東西兩嶺進向下轟擊以槍隊撲中路法謂粵人皆馮內應自以眞法兵居前黑兵次之西貢洋匪又次之教匪容匪在後礮聲震天遠聞七八十里外山谷皆鳴彈壳積陣前厚者至寸許我軍殊死戰傷亡甚多東嶺新築五壘未成爲敵攻據其三王孝祺自率小隊抄敵後仰攻敵稍卻戰至申刻蘇元春援軍至合力拒戰諸軍竟日不食至夜仍未收隊

是日王德榜自油隘出軍夾擊據文淵之對山與敵鑿  
關數時互有傷亡遇賊運軍火乾糧之駄馬無數逐之  
皆反走法糧械遂不得入關初八日清晨復大戰賊來  
益眾敵益緊馮子材居中蘇元春助之王孝祺當右陳  
嘉蔣宗漢當左左路卽東嶺敵最猛馮子材與諸統  
領約有退者無論何將遇何軍皆誅之復於各路設卡  
以截殺逃者馮子材王孝祺各刃退卒數十人賊勢狂  
悍致死已薄長牆或已越入馮子材年將七旬短衣革  
履持矛大呼躍出長牆率其兩子馮相榮馮相華搏戰  
將士齊開柵門湧出諸軍睹馮子材如此無不感奮關

外游勇客民千餘聞馮子材親出陣皆自來助戰伺便隨處狙擊馮軍扣波五營自關外西路來夾擊其背於是諸軍合力死鬪短兵火器雜進王孝祺部將潘瀛率選鋒袒臂裸體衝入敵陣故所部勤勇傷亡最多陳嘉爭東嶺三壘蔣宗漢繼之七上七下陳嘉受四傷不退至酉末王孝祺已將西路賊擊敗親率軍由西嶺抄敵後與陳嘉等合擊而王德榜之軍亦自關外夾擊東嶺之背遂將三壘全數奪回是日王德榜自清晨出軍甫谷待敵援賊至率隊衝之賊截爲二援賊因回槍擊德榜軍我軍奮擊大勝部將張春發蕭得龍戰最勇斃法

酋法匪甚多餘眾敗走獲其驃馬五十餘匹所馱皆槍  
礮彈麪餅洋銀之屬德榜遂自外夾擊東嶺奪還三壘  
法鏖戰兩日礮彈已盡而後隊軍火被截惶懼無措頃  
刻聞礮聲頓息遂大潰我軍任意斬殺賊翻巖越澗而  
竄教匪路熟先逸法兵多殲此戰所斃眞法兵黑兵千  
餘法酋數十客匪教匪數百逐出關十里而還是日馮  
子材王孝祺身畔屢有開花礮子隊落未炸我軍曩與  
法戰被挫之時率皆陰雨霏霧獨是日大開晴霧風日  
光明此初七初八兩日廣軍會合桂省主客各軍血戰  
大捷之實在情形也初十日馮子材親率十營出關攻

文淵州法匪望風潰遁追擊斃紅衣法僧一遂復文淵  
法以越官文淵州知州通款剖其腹殺之而去十二日  
諸軍三路攻諒法據諒城固守並扼對河北岸之駢驥  
墟墟有王德榜舊壘甚固黎明王德榜進攻之士卒多  
傷斃其六畫兵總一午後諸軍至王德榜與王孝祺兩  
軍戰尤力傷亦多孝祺部將潘瀛執旗先登諸軍並進  
克之法涉水而逃併守諒城十三日五鼓馮子材軍楊  
瑞山劉汝奇潛渡河攻諒辰刻克之獲其軍械糧米無  
算皆納之於官軍無私焉諸軍大至法悉眾遁分兵追  
剿桂軍楚軍追中路廣軍追西路十五日陳嘉攻谷松

賊勢仍悍王德榜力援克之斬三畫法酋一馮子材軍  
追賊至觀音橋破其巢同日克復屯梅屯梅即長慶府  
生擒五畫法酋一斬三畫法酋一遂進軍拉木逼攻郎  
甲郎甲即諒江府王孝祺進軍貴門關連日諸軍追殺  
搜獲法兵極多盡復去年官軍所駐邊界此初十日至  
十五日廣軍會同諸軍克諒後分兵追勦獲勝復界之  
實在情形也越人久苦法虐聞馮子材此次起家治兵  
欣若望歲越官越民多來入關過款當即密布閒諜宣  
慰招徠及克諒後遂慨然畫掃盪北圻之計越官北甯  
總督黃廷金糾集各路義民立忠義五大團二萬餘人

皆建馮軍旗號供糧米作嚮導或分攻或助戰北窩城內逃潰大半李揚才之弟在北窩來報官軍破郎甲彼卽率眾內應馮子材名許官賞分給旂械河內海陽太原等處皆密發約信紛紛畔法西貢亦以重金購綫通款已令莫善喜一軍由欽州襲廣安時唐景崧一軍亦由牧馬進規太原馮子材已定於二十五日親率全軍進規北窩並率勤軍同進適奉停戰撤兵之

旨乃止前軍馮紹珠麥鳳標等於二十九日尙攻郎甲是夜前軍聞

旨乃還自三月十四日起廣桂楚鄂諸軍連環卷禁

至二十日皆撤入邊馮子材之軍分屯樟山平而關等處王孝祺軍屯彬橋此二月十六日以後三月二十日以前廣軍進規北甯還

旨凱撤還界屯防關內之實在情形也竊惟法虜自去秋敗盟以來擾閩圍臺增兵據越攻犯桂軍諒陷關失以後大局岌岌此戰若再不利則南太將危欽廉隔絕兩粵事體大難措手幸賴

國家威福宏遠

詔令嚴明將士同心士卒效命遂獲大捷克復越南一省一府一州擒斬法酋二八畫至一畫數十法提督尼格

里重傷法之精銳盡殲客教離散全越驚擾法虜自謂入中國以來未有如此次之受鉅創者時滇軍亦獲大捷於是法都震懾

天威舉國嗟怨將其外部花利罷黜倉卒乞款

皇上寬仁不欲究武俯允其請休兵息民是此戰勝負之所關實非淺鮮在前敵親見戰事者僉言法二次犯關非有生力大軍難遽言戰非馮子材創築長牆與王孝祺合軍死守則諸軍無所依倚更無戰守之法當初六七廣軍苦戰兩日之後非蘇元春軍往援陳嘉蔣宗漢力拒東嶺則馮軍亦將不支非王孝祺軍疊次肉薄

陷陣橫衝敵堅則馮蘇諸軍亦不能取勝非王德榜截其後路斷其軍火關內外夾攻則亦不能如此大潰然非馮子材之素得人心忠勇奮發鎮邊安民戢掠收瀆設險倡戰料敵情散賊黨廣援應則法亦不至如此摧破瓦解惶駭遠遁故諸將皆有功而尤以該幫辦爲功首然非李秉衡之廉勁公誠堅鎮龍州力持危局上匡撫臣下調諸將弔死恤傷多方慰勞以撫殘軍苦心撙節悉力供賞以勵勇士糧餉軍火不分主客隨宜接濟則諸將亦不能成功該護撫臣之措拄挽回其功不細凡此皆參考各路電報稟函采訪關內外軍民輿論並

詢訪自龍來粵人員公論確情俱出一轍其廣軍屢次  
出力傷亡員弁勇丁已由臣之洞咨照蘇元春李秉衡  
稟同各軍奏請

獎卹不致慮有淹沒

聖主明見萬里優獎戎行其應如何

特頒懋賞

朝廷自有權衡惟是敵情軍勢將畧民心臣等既考察  
詳實不敢不詳晰上陳不惟知以前之戰狀亦可以籌  
後日之邊防所有廣軍會合諸軍保關克諒遵

旨凱撤入邊各緣由謹繕摺合詞具奏伏祈

皇太后

皇上聖鑒謹

奏

請纓客曰是役也

朝廷威靈將帥勳畧均應表暴爲千秋論世者之徵當  
是時敵鋒猛甚關內之戰諸軍稍有不支豈獨龍州不  
可問也哉廣西之邕梧廣東之欽廉勢必相繼蹂躪不  
可收拾邊事大壞我雖欲和而有所不得更無論賠償  
兵費矣賴

國家之福轉敗爲捷於瞬息間雖曰師武臣力此中豈

請纓日記

卷八

三

無天意哉失諒以來諸將多被

嚴旨寇已入關無可再退故誓死血戰而奏此捷非仗  
廟謨嚴切及

皇太后獨斷之

懿旨何克臻此法人經此挫折立即就範不索兵費俯  
首行成蓋亦氣盡力索而不敢再以兵戎向我矣第自  
南關陷後幾無人敢駐壘前非南皮尙書預籌馮王  
協桂之師則桂軍勢不能驟振然則南皮實爲功首也  
此疏所陳均係確情惜諒山既克彼族亟挽英人赫德  
以和款我且以不索兵費悅我

朝廷念臺澎萬緊之際遂允撤兵全越有可復之機而  
一旦下停戰之

詔三軍扼腕五利滋疑然以一隅論則越圻棄誠可惜  
以全局論則臺澎爲我內地越南爲我外藩得失輕重  
廟堂固有至當之權衡也

三月二十六日電香帥崧軍在東路亦自樹一幟當軸  
必以客禮待崧亦敬事諸公各軍獨崧與人無尤諒山  
牧馬不作爲甌脫此後沿邊竟須長駐兵主客軍酌留  
幾何桂軍協餉有著之款幾何龍州宜築城各隘宜築  
礮臺皆不可緩崧寢

四月初一日接香帥電李護院馮督辦唐主政劉淵亭已奏准調屯思欽請萃帥鑑帥維卿均作函檄飛催速來本部有用者願來者務須帶來少則數百多則二千俱可但須覈實數遼營規將來點驗照章給饟廣東供饟械歸洞及馮督辦調度駐紮處所到後酌定大約在上思州一帶得宜將弁如吳鷹典李唐等務須勸諭隨來洞爲奏懇

聖恩各授實缺淵亭更不待言中華一鎮遠勝越南三宣矣此時和議已定若仍在越法必不相容雲亦不能庇早來越境上建捍邊報國之功下有衣錦還鄉之樂

舊壘不必戀機會不可失若防後患洞敢保之不必疑  
慮遲迴黃守忠亦請鑑帥維卿再調率本部來不容遲  
緩萬一有變此枝可當選鋒請照辦並希分別賜覆洞  
朔

四月初一日函催黃守忠接香帥二月二十一日照會  
並黏抄電奏錄後照得本部堂於光緒十一年三月十  
一日電

奏雲越各軍宣光攻戰出力緣由今於二月十四日准  
總署十三日來電本日奉

旨張之洞奏瀝陳邊軍出力情形官軍圍攻宣光雖未

克復而疊次奮勇進剿勞績足錄著岑毓英仍遵前旨  
將十一月初五之捷出力員弁查明保奏並將雲粵各  
軍宣光攻戰出力者與臨洮勝仗案一同保奏候旨施  
恩欽此卽轉電岑等因到本部堂承准此查去年秋閒  
奉

旨飭令滇桂進兵本部堂因岑部堂督率雲軍已將循  
江東下適劉提督永福奉

旨錄用特奏派貴主政統率粵軍遠涉越疆間道往會  
聯絡黑旗以助滇軍自八月閒率營出關由牧馬以達  
宣光開關崎嶇千有餘里皆行無人之地山箐險惡不

見天日虎姪縱橫人馬顛隕繩幽鑿險艱苦異常而地  
方幽僻辦糧極難非遠到數百里外無從採購其轉運  
糧米以及軍裝器械尤爲累重艱辛至於沿途耗損需  
費繁多尙不足論嗣又創立臺站設法覓丁馳遞各路  
軍情賴以通達到防以後會台雲軍劉軍遂有十一月  
初五之捷以後復偕諸軍圍攻宣光岑部堂調度精密  
號令嚴明而諸軍亦俱能奉承指揮踴躍用命和衷協  
力聯絡救應先殲授賊繼奪礮臺血戰數月殲斃法酋  
法兵無算教匪更不待言力攻缺口內薄先登我軍死  
傷如積毫無退沮法虜號泣技窮伏匿待斃實爲法入

中國被圍窮蹙之始其時法已糧盡援絕克在旦夕若非諒山失陷敵兵分援宣光早拔今戰事已定回念諸軍鏖戰之苦似未可以堅城未下沒其前功至劉提督永福雖經敗挫其部下數月死戰亦有足錄之勞且十一月初五之役曾奉

明旨保奏茲復欽奉前因除業經恭錄轉電雲貴督部堂欽邊外合就恭錄並抄電奏照會爲此照會貴主政煩爲欽遵查照將圍攻宣光歷次出力各員弁覈實開單就近呈送岑部堂覆覈保奏並具報本部堂衙門備查望切施行計黏單三月十一日電奏一紙

雲粵各軍攻圍宣光自去秋至今正血戰最苦殲寇極  
多去年十一月初五日唐景崧等截勦獲勝已奉十二  
月二十四日

諭旨令岑督保奏施恩

懿旨頒賞其時雲軍尙未到齊嗣後各軍攻戰愈力疊  
奉電

旨褒嘉俟克後給予優獎並

飭存記徒因諒失援眾劉軍不支未竟其功然諸將仍  
守舊營粵軍以牧馬危急調防咎不在圍城之軍諒若  
不陷宣已早克查厯次皆法犯官軍其被我圍攻危蹙

自宣光始非此次力挫其鋒法早擾館司以上矣攻城  
最艱較之去年桂軍諸戰難易懸絕雲軍截獲法酋求  
救書洋文及東京法人新聞紙皆譯出可據言華兵勇  
敢異常圍攻形勢布置極善甚合歐洲所教習者法游  
擊茂連擎釐陣斃真法兵斃三分之一餘傷過半皆匿  
地窟再過七日必無一生者今事漸定攻宣之軍但有  
傷亡未聞奏獎粵軍行無人之地千餘里涉險裏糧往  
會雲軍劉軍攻勦死傷如積尤爲艱苦劉雖敗其部下  
功不可沒以後尚須用其力結其心外則綏越內則安  
邊可否仰懇

聖恩敕岑督仍遵前

旨將十一月初五之捷保奏並將雲粵各軍宣光攻戰  
出力者與臨洮勝仗案一同保獎以免向隅請代奏之  
洞肅真

四月初四日香帥三電錄後唐主政沁電悉貴部與萃  
軍相聯絡極是法復至諒殘殺此本意中事閣下怪其  
無信義何異責牛馬以衣冠乎吳鳳典李唐兩人才具  
性情速詳示淵亭近日確情並示洞支蘇督辦李護院  
唐主政中國豈利越土惟必留甌脫庶紓後患且保義  
民耳然不乘勝兵壓境而議之彼豈肯聽去冬赫德即

出調停和議彼兵方勝不允至二月初八日雲桂兩軍  
同時大捷桂趨北甯雲趨興化虜之精銳已盡新兵未  
來客教畔散響應官軍法舉國惶懼歸咎外部花利勒  
令辭職急浼赫德乞和草草定議赫德急發電至法都  
立草約限定撤兵還界期令其黨金登幹在法畫押而  
款議成矣詳約皆赫德往來傳達聞亦將定歐脫無望  
矣

廷議因彭失臺急俯從法請不知臺越互相劫制我重  
臺彼尤重越去年洞屢陳緩臺在急越又云河內急則  
臺灣解又云半年法不能踞全臺今諒山克而法已請

和若北窰興化克臺北雖失亦必還我况不失乎撤兵而後議約悔之晚矣洞支唐主政密閣下解人也安得人人如維卿哉接此電後即復洞支

四月初五日電香帥吳李到龍即止其募奉朔電所示適符劉與虜不兩立然不命之戰亦不敢妄逞其戀越者因輜重田園在保勝耳崧再四函勸據吳李云必從所屬論者謂不如仍留保勝可以蔽滇但今昔不同一則法必不容必逼中國遷之二則虜以全力攻保勝劉無助豈能久支滇不足蔽適以陷劉前勸劉赴桂即籌

庇法崧微

四月在龍州催淵亭入閩赴桂書曰吳督帶李胡兩管  
帶晤於龍州兩接惠書一切覽悉已付吳李銀一千兩  
矣招募一節令其暫緩俟執事到時再議香帥來電亦  
同現已派弁送伯瀟於十五日起程赴東進謁香帥面  
稟情形來書所云存亡弁勇家屬零丁孤苦各情弟已  
一一電陳今接香帥復電鈔錄寄覽香帥爲執事謀者  
至優且詳來電許給二萬金則弁勇眷屬自可成行若  
再戀戀保勝必遭不測來書所云與法人聲明以興化  
爲限不可上犯之語執事細思法人能如此守約不背  
乎何其觀理不明並鄙人疊催赴桂之意均不省悟香

帥奏調執事赴桂駐防具有深意無非爲執事委篤之  
至計並非迺其遷籍何乃誤會儻再徘徊保勝不獨負  
否帥與鄙人一片周全之苦衷實亦拙於自謀大丈夫  
感恩知己即令赴湯蹈火亦有所不辭何況勸駕東來  
實爲執事一身起見昨接彥帥來函謂尊處乞請路費  
業已允行是彥帥亦並非薄待豈可一味執性違抑總  
之速速赴桂爲是即一時難於啓行亦必遵

旨按限先撤入雲南境內至要至要弟與執事性命相  
依二人萬死一生幸保骸骨所代爲謀斷無以是之處  
設再不聽鄙言則此後一切弟必不能照料幸勿自誤

後悔不及金石之言千萬詳度臨穎不勝馳系之至  
四月初八日約鍾西耘尹仰衡南甯鍾孝廉游紫霞洞  
龍州五十里山在河干兩洞毗連跨山之半有樓  
有亭有半月廊龍州同知蔡仲岐所修葺也數年從事  
鞍馬日居卑溼帳中幾忘世閒有棟宇几榻之樂至此  
精神爲之一健窗外碧桃一株虬枝拂檻客袖皆綠晚  
酌畢披襟坐山門風月下俯聽河流淙淙有聲道士爲  
言曉山撫軍被逮時舟行過此游眺竟日而去不覺邊  
關情事悵觸心頭體不耐涼先歸樓卧四人聯榻談至  
四鼓初九晨起游洞參佛觀音蓮臺鑿石粲粲壁鐫璧

窠大書皆禱神俗語惜玷佳境午後舟旋有詩二章絳  
天新卷漢旗回更看江霞江上來極目重關誰鎖鑰置  
身百尺有樓臺綠窗桃葉迎人笑白石蓮花抱佛開賴  
有君謨最風雅甘棠留種水雲隈匡時抗疏奏明光  
俱有時務奏疏  
仰衡與余在都  
星象珠聯聚一方如此風雲遐邇合揭  
來林壑覓清涼重游赤壁言猶在是日李蘭生許天一  
不至有約再游  
宿曹溪去太忙何必勳名比銅柱千秋詩碣鎮炎荒同  
游者皆有詩僅記西耘一聯云世閒不信無風馬眼底  
何曾識海鷗屬李蘭生繪游紫霞圖西耘繼有詩來造  
語拔俗錄之昨日從紫霞握手得君語動勸趨窮邊斗

瞻孰扞圉我馬初欲西旁看足踏距重山起蔽日無路  
上嶽峯藤筈陰結蟠雲霧氣如瀛日夕無人煙行者駕  
擣杵笞兵走其閒徒步仗腰脅掬水慰飢卒安敢意炊  
黍回頭路三百談齒發酸醎恩窮以威通此亦天覆處  
魑魅今縱橫有責實在禦孤軍軍其城天地易寒暑雨  
鐵雜寢飯雷電相爾汝男兒須奇功礮此牛角鼠鬼章  
不就禽時事遽如許吾嘗聞之君兵策豈豪舉迹粗功  
用神後孫祖先呂瞋目語海難萬眾眇螻蟻君今遇真  
知縛虎繩以苧登壇易轉燭餘子固邾苗策馬登南關  
吾肩想娘鉅誰居梗中達心止聽柷敔得時奮龍木退

可擁牛簾英雄不相惜誰與策烏鵲其諸同心人有味  
入樽俎世方挾喜怒捫腹較迎拒吾當推吾心灑雪瓶  
可煮世方挾恩威顛倒售酷醜吾當公吾心拔茅且及  
茹我眞愚無知口舌受齟齬蹀列抱枝幹固未學刻楮  
已決袖手歸長嘯返林墅氣焰不足多安閒長吳楚蛟  
龍翻滄溟何爭一洲渚重屋排雲霄負荷必柱礎遇我  
君獨深卣醡醑古秬拂衣行當東顧心盡篴箇

四月初九日香帥電總署初八日來電本日奉

旨岑毓英奏停戰撤師仍嚴密整備一摺覽奏均悉阮  
光碧等情殷效順實屬深明大義現在詳約未定著岑

毓英設法維繫其心儻有驅策之處仍可得力所奏請  
賞刃文撐等宣撫土司之職分界現未定議且屬國地  
方官員向不由中朝除授應毋庸議刃文撐等如果情  
深內附該督當查明實係情切尤爲出力者令其隨同  
入關妥籌安插請旨遵行其仍留越境者應俟定界奏  
明分別辦理劉永福仍遵前旨飭赴欽州歸張之洞調  
遣欽此

四月初十日查取各營宣光打仗出力文武員弁職名  
申請彥帥香帥豹帥奏請獎勵並稱景崧事不償願無  
功足錄不敢仰邀保獎

四月十二日黃守忠來見自帶三百餘人營官農耕貴  
帶五百餘人未到餘隊不願入關者留在河陽編其軍  
爲景軍忠字左右兩營守忠仍爲督帶越官梁俊秀專  
人入關求借軍火畀洋槍二百桿

四月十三日香帥電奏越留二員歸二員攜岑督咨師  
當如期撤惟劉永福安置未定越義民未得所勑出示  
不日派兵討逆賊即指劉與助軍義民師一撤法必與  
戰勝法必疑我不勝越民必求入關納之法有詞拒之  
非恤藩失嚮義心屬代電奏請

旨等語劉稟感

天恩遞來粵求帶舊部三千人又部下孤寡十餘家收養多年須籌安置又軍械輜重甚多須遷移免資敵又歷年戰事求獎卹又請留其子通判劉成良在保勝候示邊等語吳得祿稟劉軍恐一兩月未能全撤勑意只在劉移雖入關稍遲法當允等語委員孫鴻勳回稱勑言岑撤一步法即進一步岑咨劉稟俱實情等語洞查劉在越根蒂深不帶本部劉不能來洞前許帶二千當可聽安部眷可給資遷輜重可寬期獎卹仰求

恩准可否由洞奏請留子在越已駁竊謂從容商辦中法均宜若法進太速逼劉過甚必生衅至法殘桂邊義

民洞已奏雲邊義民請

敕岑邊辦併

敕總署北洋商法慎辦務求妥善勿以急遽誤事邊疆  
幸甚祈代奏請

旨遵行之洞肅元

四月十四日香帥電奏頃探得確信法毀澎湖房屋分  
三街建兵房作鐵礮臺二月內共擄民船十六七勒船  
客作工詢左同又接左電臺灣錄孤拔告示甚澎由法  
兵暫行駐守華所得東京地由華兵暫行駐守詳約定  
即退是法並不責我先撤兵徒欺蒙

朝廷愚華助法撤兵而後定約已中詭計岑因路滯抵  
界稍緩劉因累重內徙難速乃是實情非不撤似可援  
孤拔此示以折法免過促難辦越員稟在越確知法畏  
劉勃及法兵官諄探劉撤否趁岑劉尚在越詳約較易  
商洞已屢調劉矣請代奏之洞肅願同日雪帥香帥會  
銜電奏詳約聞將盡押大計數端務宜詳慎一雲桂界  
越宜留顧脫一桂邊通商不可輕許邊防無長策一劉  
永福能調而不能速急則恐生枝節一臺澎萬不可令  
屯兵法現修澎礮臺宜阻一英法最親赫德英人處處  
助法愚我詭謀顯著法若得利他國均霑斷不可信望

欽定國朝通志

欽定樞臣總署全權詳覈並電

敕沿海沿邊疆臣籌復再定畫押以後挽救無及一聞  
金登幹在法立草約係與斐禮盡押其時斐禮已黜法  
甚詫異查斐禮狠狡好兵與孤拔爲黨力主攻華吞越  
之人因諒敗眾攻去位請商法都月派大臣定議畫押  
責斐禮厯年辦理不善以伐敵謀杜後患不然因越用  
兵兵勝而越仍棄因臺許和和成而臺終危與法立約  
約成而各國得志恐貽

國家無窮之悔臣等深憂不避冒瀆求

聖主熟思大計幸甚前五條臣之洞已奏未悉是否允

議茲將畫押敬敢由懇末條似尤要謹電奏請

旨請代奏玉麟之洞同肅願同日電香帥密梁俊秀專  
差入關求假軍火擬借以大吉槍數百桿助彼守土即  
爲我捍邊不與恐失其心有事不能再用聞游勇於二  
月擊斃從法之越官丁觀珍獲火器甚多諒牧山北義  
民昔黃趙屢給槍械不克收回似應報總署與法言明  
此事嗣後游勇越民有火器與法鬪不得咎我暗助豫  
杜藉口察寒

四月在龍州派魏雲勝督帶景字正前左右後四營王  
寶華督帶副前左右後四營礮軍營在牧馬已改派龔

士珩管帶歐陽萱仍帶中營合黃守忠兩營共十二營分紮下凍及水口關更隘一帶在龍州之右余坐營在下凍關帝廟

四月十九日香帥電總署十八日來電本日奉

旨李鴻章奏法電吳稅司言雲督不肯退兵回界謂須奉旨全退方可欽遵等語其言固不足據但撤師之期早經約定且雲軍路遠已議展十日現在條款不日畫押爽約之衅豈可自我而開岑毓英惟當稟遵疊次諭旨將全軍按期速撤至界並與張之洞催劉永福一軍如期撤回雲界再赴思欽中外交涉惟以信義爲重況

中旨屢降大計攸關在遠疆臣自未能深悉情形何得  
於事及垂成再生異議將來設有貽誤再蹈十年覆轍  
該督等豈能當此重咎耶岑毓英接奉此旨後即將啓  
程及何時抵界日期速行電聞欽此

四月二十五日香帥來文節錄查中法款議已定滇桂  
各軍撤守邊界劉提督所部在越非主非客於義未安  
且法人既與劉軍爲仇越地久歸法人保護豈能留彈  
丸之保勝供土馬之飽騰應欽遵疊次

諭旨速帶得力舊部一兩千人由劉提督自行酌量貴  
精不貴多並劉提督親丁眷屬一併起程離越先入滇

境轉至龍州再行募足全軍聽候指定或思或欽屯紮  
調遣爲要至其餘屬年部眾家屬越地輜重資產應由  
劉提督隨宜斟酌妥爲安置除照會劉提督辦理並分  
別咨行外相應照會貴主政煩爲查照選覓熟識劉軍  
將弁齋文加函飛速移知劉提督遵照辦理施行

四月二十七日催李蘭生繪游紫霞洞圖初蘭生倚琴  
帥得意今李護撫惡將劾之因藉催畫諷以詩曰深山  
深處如人世幻盡朱霞與白雲已過清和好時節畫圖  
遲了李將軍後終被劾本日接李燕伯同年三月二十一  
六日來書書曰每聞捷音輒一起舞吾粵三百年來未

聞以儒將著者泰西通商五六十年來亦無如此次受我折挫者兄以管敬仲有爲之才當陳同甫無聊之境憑此血誠上達

天聽遇奇而力偉回思初到廣州躊躇進退之時至不得已而欲以逋臣自居淚隨聲下形竊爲扼腕歎息者數矣此種苦心所謂至誠未有不動者耶惟是有口通商即有一日邊事如執事者何可多得才難變巨憂喟實深形耳之所聞目之所見以及早夜所思讀書閱歷之所得無不極力推求亦欲獲有用於世第仕宦不可以求而得知遇不可以干謁而來茲無論其大者遠

者即一官一邑尙未假手而徒蒿目時艱杞憂在抱此身何益人閒近惟讀書思取古今掌故與時事合者稍爲纂述再則薄有詩文幾卷山花自開谷鳥自鳴藉以消遣壯志無他長足以告慰二十載之知交也並寄詩五首爲景軍鐃歌廿年簪筆侍承明一出都門便將兵殺賊歸來看草檄纔知霍衛是書生載酒江湖杜牧之感春樓上夜題詩請纓便是韓忠武兒女英雄事事奇椎牛犒士一軍歡月照瀘江劍氣寒宣光瀘江灑偏烏支頭上血征袍三日未曾乾幾人居狗賣漿巾能捍邊關即是功亡命莫教西夏去張元吳昊本英雄搗穴犁庭

事豈難憤時誰共寸心丹連朝鉅鹿城邊戰諸將皆從  
壁上觀

請纓客曰燕伯原名鶚更名愛形吾二人布衣時負極  
咸豐辛酉締交於桂林會城之寶相菴中灑落天真不  
知世閒有憂戚事是年鄉試余領解燕伯亦捷同坐公  
車北上於是交情日老蒼矣而憂亦漸來燕伯屢蹠春  
官節母在堂捧檄情切乃納貲官廣東知州愛知於張  
振軒制府未嘗一日儕諸閑散也燕伯善處家庭孝友  
無閒立品狷潔力爭上流其講求時務不爲迂遠難行  
之說小試於欽州勤苦愛民若惟恐所行負所學者南

皮制府疏其政績入告世患無千里馬耳豈患無識馬之伯樂哉平生知交數百輩信其志潔行芳厯久不渝者惟燕伯與吾宗芷菴而已矣而燕伯尤能閭閻與世無忤也當日答以詩未寄僅記卒章云三千甲士解吳鈎百戰歸來願不酬兒女英雄都抱恨花殘月黯感春樓

四月二十八日探聞法人由船頭修路至威埔慘役越民姦淫婦女游勇頭目蘇二何三在苑葑五百人謝二在州晞三百人鄧賓權黃二馮滿在新街一千人李逢春在大社三百人王大朋在帕拉二百人亞來何三在

燕雄四百人梁正理在山西二千人又帶越民三千王  
太忠在太原三百人黃廷金募華勇士不計數  
皆通函於我乞濟軍火願復越圻聽候指揮余權爲維  
繫之

四月二十九日香帥電李護院唐主政總署二十四日  
來電本日奉

旨李鴻章電奏林椿來言法約定一月內退澎湖如劉  
永福不退保勝澎湖亦須遲退等語現在詳約將定中  
外交涉惟重信義劉永福一軍亟應如期撤回著岑毓  
英張之洞懔遵十八日電旨嚴催該提督即率所部迅

回雲界再赴思欽不淮稍有遲延致令藉口其起程抵  
雲日期仍速電聞欽此法以澎湖爲質劉一日不離越  
中國海防一日不能結局斷無展緩之策即請維卿恭  
錄此

旨弁加切函曉以禍福速派妥弁兼程飛遞劉提欽邊  
此員由何道前往岑帥必已過限入關應到岑營探明  
劉駐處往探似可由歸順往不必由越到彼約須幾日  
此弁何日起程即示復如維卿無員弁可委請鑑帥酌  
派員弁聽維卿差遣並請鑑帥恭錄咨岑帥洞豔余旋  
派遊擊周榮春都司劉光明給予路費百兩准於初一

日兼程前往取道歸順入開化府恭錄

諭旨並致切函交兩弁齋投書曰飛啓者四月二十三日曾由岑宮保處轉寄一函計尚在途閣下現在何處務懇飛速示知其函即送宮保營轉遞來龍甚速茲承  
香帥電寄

上諭一道恭錄派弁齋投麾下得此信後已入雲界固好如尙羈留保勝務望遵

旨立即拔隊離開保勝速進雲南切不可再流連越地致令法人藉口不肯退出澎湖貽誤大局此閣下前程之所係香帥之所切屬鄙人之所急勸儻再違延禍將

立至時事業已至此吾兄自揣力量如無人助饑銀軍火  
豈能久據保勝而無恐如敢不遵

嚴旨退入雲界換出澎湖誰又敢助貴營餉銀軍火耶  
大丈夫明哲保身再看將來機會違

旨身且不保更何有於保勝切切三思速速拔退望即  
將離越入雲日期飛速函知

請纓客曰余豈欲劉離保勝哉蓋至是不得不爲劉計  
矣南望傷心惟自知之

四月朱曼伯觀察來龍州總辦西轉運局贈余六朝碑  
搨邊關獲此如希世珍矣蜀人廖光號蜀樵少年清品

贈詩箋書畫俱秀逸

請繆日記卷之八終